



Terenga 2: Hōtaka 05 – He Kīwaha

E te pio, e te makiu, pōi mai ki tēnei kaupapa i waihangahia ai hei āwhina i te hunga pīkoko ki te ako. Ko koe tēnā, ko au tēnei. Kia whakarewahia e tāua tō tāua waka.

Hei Mahi Whakarongo

E noho pani tonu nei te ao Māori i te rironga atu o te hōia o te reo Māori, o Nanny Mate Kaiwai ki te mūnga o te tini i te pō. I te rā nei ka hoki ngā mahara ki a ia, nōna ka uiuitia e Julian Wilcox mō ngā āhuatanga o tēnei mea, o te mita o te reo.

1. He aha te tikanga o te kupu 'korakora'?
2. He aha i tere ai te rere o te reo o Ngāti Porou?
3. He aha te kīwaha Māori mō te kōrero 'you think you're just it'?

Whakatauritehia ō whakautu ki ērā o ngā ākongā o AKO.

He Whakamārama

Kua pā mai he āhuatanga. Ki ō whakaaro, mehemea i rerekē te āhua o te mahi a te tangata, kua kore pea i pā mai taua āhuatanga. Mō muri ō kupu whakahau i ngā kupu 'Ka mahue te...'

a) I moeroa te tāne.

e) I tōmuri tana tae atu ki te mahi.

He aha te āhuatanga i pā?

I tōmuri te tāne ki te mahi.

He aha i pēnā ai?

I moeroa ia.

Me aha te tangata kia kore ai ia e pēnā? *Me oho moata. Me whakarite mataara whakaoho.*

Ka mahue tō whakarite i tō karaka hei whakaoho i a koe.

You should've set your clock to wake you up.

Ka mahue tō haere moata ki te moe.

You should've gone to bed early.

Hei Manatu - "Kei runga noa atu"

Ki te titiro te tangata ki ēnei kupu, ka tupu te pōhēhē e tino mihia ana te tangata mōna i tae ki taumata kē atu i roto i tētehi mahi. Mena ka whakamahia tēnei kōrero hei kīwaha, he wairua whakamihi tōna, engari kāore e pērā rawa ana te kaha o te whakamihi i tā tātou e pōhēhē nei.

Kei runga noa atu tā koutou haere ki te āwhina i a Ngāi Tahu i muri i te rū whenua.

Good on you for going to help Ngāi Tahu after the earthquake.

Anei kē ētehi kīwaha pai hei whakamihi i te ekenga o te tangata ki tētehi taumata teitei tonu i roto i tētehi mahi.

*Ko koe tonu a runga!

*Kāore e kō atu i a koe!

*Kātuarehe!

Hei Mahi

Whakamāorihia ēnei rerenga:

1. I should've picked you up to go to the funeral.
2. He should've told me he didn't want to go.
3. They're the top of the pops!

Whakautu:

1. Ka mahue taku tiki atu i a koe kia haere ki te tangihanga.
2. Ka mahue tana kī mai kāore ia mō te haere.
3. Ko rātou tonu a runga! / Kāore e kō atu i a rātou!